

## Pionnéier mat Wäitsiicht

**Usprooch vum Jeff Boonen,  
Nationalpresident vun de Lëtzebuenger Jongbaueren a Jongwënzer**

Léif Éiregäscht,  
Léif Kollegen vum Oeko-Zenter,  
Léif Memberen a Frënn vun de Lëtzebuenger Jongbaueren a Jongwënzer,  
Dir Dammen an Dir Hären,



**E**t ass fir mech eng grouss Éier, Iech de Moien als Nationalpresident vun de Lëtzebuenger Jongbaueren a Jongwënzer hei op eisem Stand op der Foire Agricole ze begrëssen, fir de 25. Anniversaire vun der Ekologischer Landwirtschaftsberodung ze feiern.



Et ass e flotten Anniversaire, dee mir op dëser Plaz hei zu Ettelbréck feieren: Mir als Jugend- a Bauerenorganisatioun schaffen elo scho 25 Joer gutt mat enger Umweltorganisatioun zesummen. Wahrscheinlich hat deemols keen am Bauerenmilieu geduecht, dass déi Zesummenaarbecht esou laang géif bestoe bleiwen. Haut ass den Emweltschutz an der Landwirtschaft net méi ewech ze denken. Et gesäit een, datt d'Pionéier vun der Ekologischer Landwirtschaftsberodung deemols schonn dat richtegt d'Gespieler haten, fir dat, wat nach haut an der Landwirtschaft gebraucht gëtt.

Ech wëll dofir - virun allem - menge Virgänger an hire Komiteesmemberen e grouse Merci soen. Si waren déi, déi zesumme mat de Membere vum Oeko-Zenter, de Wee vun der Zesummenaarbecht gaange sinn an all eis Beroder encadréiert hunn. Et ass bestëmmt - genau esou wéi haut - oft vill diskutéiert ginn, mee et konnten ëmmer Kompromisser fonnt ginn.

Fir äis d'Jongbaueren gëtt et verschidden Elementer, déi immens wichteg an dëser Zesummenaarbecht sinn. Iwwert den intensiven Kontakt mat de Leit vum Oeko-Zenter errechen mir e kritesche Konsument, deem mir erkläre kënnen, wéi et op eise Betriber leeft an datt net alles vun haut op muer geännert ka ginn. Et ass awer och flott, datt si äis am Dialog matdeelen, wéi si sech d'Landwirtschaft virstellen.

Duerch d'Liberaliséiere vun den Agrarmäert an de leschte Joeren ass de finanziellen Drock an den Betriber geklommen. De Schratt fir méi Naturschutz unzegoen, gëtt oft als schwierig vun de Betriebsleeder ugesinn. Grad dofir ass et wichtig, datt mir de Baueren verschidden nei Weeër iwwert dës Berodung opweisen an Iwwerzeegungaarbecht leeschte kënnen.

Zënter dem 1. Abrëll 2012 hu mir eng nei Landwirtschaftsberoderin an der Persoun vun der Madame Katharina David. No dem Diskussiounsprozess vum leschte Joer, hu béid Organisatiounen sech dofir ausgeschwat fir eis Landwirtschaft méi regional ze gestalten. Fir dësem Zil méi no ze kommen, schafft d'Katharina elo un zwee Haaptprojeten: Deen éischten betrëfft d'Eiweiss-Autonomie, déi an Betriber ausgebaut soll ginn, fir der massiver Importatioun vum Soja aus Amerika entgéint ze wierken. Am zweete Projet geet et drëm, fir d'Schoukantinen aus verschiddene SICONAS-Gemengen beim Asaz vu regionale Produkter ze begleeden.

D'Katharina wäert lech elo gläich en detailléierten Abléck an hir aktuell Aarbechte ginn.

Erlaabt mir awer nach e puer Merci ausdrécken. Deen éischten Merci geet un d'Equipe vum Versuchsfeld vun Iwerleng, mat där dee jeweilige Landwirtschaftsberoder ëmmer gudd zesumme geschafft huet. Zu Iwerleng ass ëmmer probéiert ginn, fir innovativ Feldversich ze maachen. Iwwert dës Wee konnt deen een oder aneren iwwerzeecht ginn, fir eng nei Kultur a sengem Betrib unzebauen.

Da geet natierlech e Merci un all déi Baueren, déi bereet waren, fir mat der Landwirtschaftsberodung zesummen ze schaffen a nei Weeër ze goen, och wann déi sech net ëmmer als finanziell rentabel erweisen hunn.

E grouse Merci geet vun mir aus och un de Landwirtschaftsministär, deen dës Berodung all Joer finanziell ënnerstëtzt. Den Här Minister Romain Schneider a seng Virgänger hunn eis Zesummenaarbecht ni a Fro gestallt an haten ëmmer en opent Ouer fir eis Uleies. Mir géifen äis freeën, wa mir och nach déi nächst 25 Joer op hir Ënnerstëtzung ziele kënnen. Well, wann een d'Reformvirschléi vun der Agrarpolitik kuckt, da gesäit een, datt mir déi nei Ziler ganz kloer mat eise bescheidene Mëttelen verfolgegen.

Ech soen lech Merci!